



HUBENTUD DEN MOVECION



Pa: Mercedes Abdul

Ryan Peterson:

PASANDO STAGE A COLABORA CU DESAROYO DI EPB NA ARUBA

Seccion Hubentud den Movecion a conversa cu Ryan Peterson, kende ta cabando su estudio di Education Science na Hulanda (Toegepaste Onderwijskunde). Actualmente e ta den e fase final di stage na Departamento di Enseñanza den e proyecto di EPB, cual experiencia tabata hopi rico pa su persona.

Diabierna proximo Ryan lo bolbe Hulanda pa sigui traha riba e topico di EPB y sigui specializa den enseñanza.

ESTUDIO

Ryan a pasa su enseñanza basico na Paulus School na San Nicolas. Despues el a bay Colegio Arubano na San Nicolas tambe unda el a haci su prome tres aña di VWO y el a caba na Colegio Arubano na Oranjestad. Na aña 1991 el a slag pa su eindexamen pa sigui cu su estudio na Hulanda.

Tocante e estudio cu el a scoge, Ryan ta relata lo siguiente:

"For di chiquito caba semper mi tabata kier bira docente. Den brugklas e idea aki a cuminsa door di un profesor di Wiskunde cu a laga un bon impresion cerca mi.

Desde brugklas mi kier a bira un docente di Wiskunde.

Semper mi tabata interesa pa siña hende, pa nan siña algo nobo. Ora mi a yega Colegio Arubano na Oranjestad mi a ripara cu tin cierto problema na school y cu nos sistema educacional. Y e ora ey mi a dicidi cu mi kier yuda cambia e sistema y cu si mi kier cambie mi mester amplia mi conocimiento den enseñanza.

Ryan ta bisa cu na e momento ey el a bay den busca di un profesion cu tabata pas den lóke e kier a logra.

"Dos aña prome, na 1989 mi a bay Hulanda, y mi a bishita diferente universidad pa wak ki sorto di posibilidad tin.

Al final mi a scoge pa bay studia Toegepaste Onderwijskunde na Enschede".

SPECIALIZACION

Ryan ta splica kico e estudio aki ta encera, cuanto aña e ta tuma, y kico por haci ora obtene e diploma.

"Pa cuminsa, unico lugar na mundo cu bo por studia 'Toegepaste Onderwijskunde' ta na Enschede. E estudio aki ta dura 4 aña. E prome dos añanan ta basico, e di 3 aña bo ta bay specializa teoreticamente, y e ultimo aña bo ta pone e teoria den practica. Ora bo ta cla tin diferente specializacion. Bo tin Desaroyo di Curriculum, Onderwijs Management (maneho di enseñanza), Onderwijs Informatiekunde (Informatica), Onderwijs Onderzoek (Investigacion den enseñanza).

Mi specializacion ta Onderwijs Management. Den mi caso bo ta guia procesonan den educacion, bo ta resolve problemanan den educacion, bo ta desaroya sistemanan educacional, y bo ta duna conseho con pa mehora enseñanza.

Tur esaki riba un nivel macro. Esey kiermeen no na un nivel den e klas mes, pero un nivel di bestuur y directie".

PASANDO STAGE

Tocante su stage na Departamento di Enseñanza Ryan ta señala cu semper e tabata kier bin bek Aruba pa yuda cu e desaroyo di enseñanza.

"Aña pasa mi a manda carta pa solicita pa wak si nan tin un lugar pa mi. E ora ey mi a haya sa cu nan tabata bezig cu desaroyo di EPB. Mesora mi a reacciona riba e oportunidad aki pa ta parti di e team cu ta trahando pa, y riba, e proyecto di EPB na Aruba.

Na December 94 mi a bin pa dos luna pa investiga e situacion y pa wak ki e necesidad ta y na unda e problemanan specifico ta pa EPB.

Despues mi a bay bek Hulanda pa haci un investigacion teoretico di literatura pa haya sa con nos por mehora e situacion di enseñanza na Aruba.

Actualmente mi tin 3 luna aki na Aruba, y mi a yuda Project Bureau di EPB. pa nan desaroya un organizacion di school cu ta efectivo. Cu esey mi ta introduci mesora mi specialidad cu ta "Ontwerpen van een Effectieve School Organisatie". Esaki kiermeen cu bo ta desaroya un organizacion cu ta zorg pa e proceso di instruccion den e klas mes ta di calidad halto, y cu ta consistente cu su omgeving y cu su sistema educacional.

Esaki ta encera cu ora bo ta desaroya un organizacion efectivo bo ta usa un "bottom-up approach".

E "bottom-up approach" ta encera cu bo ta wak na prome lugar bo meta, na di dos lugar kico bo mester haci pa logra bo meta (e fun-

cionnan cu mester worde haci) y despues na ultimo lugar bo ta bay wak con bo ta bay pone e funcionnan aki hunto atrobe. Coordinacion ta hunga un rol crucial den e proceso aki".

Diabierna awor Ryan ta bolbe Hulanda pa sigui traha 3 luna mas riba EPB, despues na December e ta finaliza e estudio aki, pa despues specializa riba "Effectieve School Organisatie".

Su experiencia formando parti di e team pa prepara y ehecuta EPB na Aruba tabata sumamente interesante.

"Den e ultimo tres luna no solamente mi a siña e contenido di e trabao pero tambe con pa anda cu e contenido. Pasobra e topico ta masha nobo na Hulanda y na Aruba, e ta di hopi importancia pa e hendenan cu ta traha pa, cu y den e organizacion sa con pa anda cu e contenido pasobra e continuidad di e estructura ta fundamental.

Na Aruba (den practica) mi a siña cu no ta tur ora bo por practica teoria asina facil. Bo mester ta hopi creativo pa sa di soluciona cualquier obstaculo of problema. E parti creativo aki ta lóke a duna mi trabao na Aruba un "meerwaarde".

Mi ta bayendo Hulanda cu hopi mas conocimiento di practica en general y Aruba en special. Mi ta kere cu

esaki ta di sumo balor pa mi pa ora mi sigui specializa na Hulanda, e por yudami na pensa ben riba Aruba y con pa anda cu e teoria na Aruba".

FUTURO

Ryan su intencion ta pa sigui studia cu e meta pa den futuro bolbe Aruba.

"Mi ta kere cu si mi kier yuda Aruba lo maximo posible mi mester amplia mi conocimiento mas y experiencia otro cultura y sistemanan na otro paisnan di mundo. Ora mi ta satisfecho cu esaki, lo mi haya mi mes cla pa bin bek y yuda mi isla cu su desaroyo".

ESTIMULO

Finalmente Ryan ta referi na e motornan cu a estimule den su desaroyo personal.

"Na cas semper mi a siña cu si bo tin un meta dilanti bo y bo kier logra algo, pa mas cu con duro e ta, bo no mester "give up" pero lucha pa logre.

E importancia di esaki ta cu bo ta siña bira responsable, kere den cierto balornan, bo ta desaroya disciplina, self-tima, independencia, y si bo no logra algo tog, bo ta satisfecho pasobra bo sa cu bo a purba".

